

四庫全書

集部

欽定四庫全書

集部

秋澗集卷十五

詳校官侍讀學士

臣沈咸熙

侍讀_臣孫球覆勘

總校官降調編修

臣

倉聖脉

校對官助教

臣

汪錫魁

謄錄監生

臣

汪騰蛟

欽定四庫全書

秋澗集卷十五

元 王惲 撰

七言律詩

遂大夫廟

芒鞋兩自近關行
頗訝先生出處輕
道亟卷懷傷喪亂
仕因公養辟尊榮
輟車彷彿公門敬
寡過依稀聖者清
故國令名喬木老
至今君子號鄉名

苦雨吟

禾頭生耳駭輪囷一雨霖霖近數旬蛙出故塘喧鼓吹
蟻連封垤失君臣陰沉便恐陽烏慘飛舞爭看石燕神
寄謝碧雞坊裏客不煩羹釜怨生塵

迎秋

大暑回推酷吏休先聲傳喜到梧楸清商載路歌夷則
白駱前驅候薦收氣肅袞裳初復辟露清行殿拜凝旒
若論成給功尤著不解詞臣九辨愁

明霽

雷霆威霽雨初迴戰罷昆陽萬馬推成給歲功真有望
洗清天宇覺重開秋茵出木驚朝暮野水增波阻往來
腰足痺頑欣一散約攜藜杖晚登臺

箕子廟

廟在
汲郡

剗剔忠良詫肉林當年愁絕父師心道傳未害奴為辱
俗古方知化獨深上念聖湯思自獻下逢周武是知音
野烟無地尋遺廟空咏芄芃麥秀吟

挽梁防禦邦傑二首

酒船茶竈柳溪烟把臂論交記昔年
列郡剖符方再考
銘旌埋玉便終天
風纏大樹摧蘇廟
雲黯歸魂近赫連
四十三年成底事
一抔慟絕九山前

梁侯躍馬英妙年
大冠修劍身傾然
閉車過市殊不樂
快意耳後抨驚弦
朝吟醉卧石樓上
暮歸射虎南山前
聞說三城足遺愛
令人空憶使君賢

奉答彥正參議書問

清晨庭鵲喜相呼
薄暮敲門得素書
地重每愁屯胸臆
人來還喜駐清居
煙開瘴嶺三軍壯
氣壓巴江百戰餘
一檄我知邊報靜
西南爭識漢相如

酒醒聞雪作

呈陳侯

陰雲低壓溼衡茅
暖透衾裯地氣交
縞色漸生明月幌
風聲先到碧筠梢
誰家獵騎長圍去
何處柴門向曉敲
開歲春風兩歧秀
好看晴浪際農郊

至元四年歲在丁卯暮春之初陪陳王二郡侯

泛舟清水魚攜妓樂

山圍牧野青未了河抱鄜城勢轉雄
高會遠為開府設仙舟還許李膺同
春光淡沲明歌扇吹管飄蕭颺遠風
鄭重使君雙皂盖月灘留醉恨匆匆

風暖溪深夾岸花緩移蘭棹轉灘沙
醉停杯酒清歌靜看弄漁舟白日斜
誰與浣花徵故事行觀春物到山家
沙堤不用雙紅燭馬首歸時月有牙

故事太守自正月廿日浣花止

山迴路轉無多曲風軟舟輕恰數人
汀樹弄晴供望眼

岸花迎笑喜行春
千年勝賞蘭皋在五郡
謳吟使節新
多謝惠風吹醉帽
惺惺恰及到城闌

寄王總管子初

新築茅堂並水扉
柳陰連接到漁磯
平疇綠滿禾方秀
高樹涼多露未晞
挾策不干丞相府
入山終製芟荷衣
故人好在龍津府
書葉飄香吏事稀

和節齋言懷詩韻

元龍湖海見平生
老我韜鈴未易兵
格物志精先實學

救時心切恥虛名風雲自是龍頭客吟笑空懷壠上耕
袖裏驪珠三百顆每從開宴得晶明

林塘秋晚

躡足煙霄謝俊遊野人高興在林丘近山欲雨先衣潤
秋水增波拍岸流木葉靜時存復理人心安處即天休
隔溪田父治荒穢斜日疎煙滿樹頭

卜築

塢溪流水平村斜林杪青山隔岸賒平日買田惟樂此

他時成趣要移家溪邊種柳眠黃犢竹底開門繞白沙
任使旁人呼漫浪雨簑無負釣魚槎

送王子初總管奉詔北上

聖代崇儒意匪輕徵車相望半諸生九天雨露思賢相
十載經綸見老成更化有方先定制救時無驗是虛名
煙霄未遂攀鱗志葵藿空懷向日誠

簡寄楊治中文卿

貳車沁水瞻高駕簿領南臺有舊遊邂逅一樽淇上酒

笑談千古庾南樓
豐狐闖首藏三穴
一鷄盤空健九秋
聞道清源足佳景
竹林烟雨夢西州

上史丞相

百揆端歸一相尊
中臺潛隱北溟鯤
人間桃李淨晴晝
天上風雲擁戟門
駕蹇遇知思一顧
家山回首惜空奔
幸蒙翦拂長鳴去
會有文章報至恩

題相者訾同春

野隱東過滄海翁
醉吞秋日入心胸
神機深探乾坤秘

真氣曾驚戶牖龍驢背老髯掀一笑春風歸路指三峰
昂藏我似賓天鶴夢遶仙盤露影濃

和高麗參政李顯甫

恩波如海際天隅一日京師識老蘇喜向巖廊瞻漢相
疑隨仙仗聽嵩呼衣冠自是乘槎客文采還驚照乘珠
共羨朝天蒙寵渥三韓秋色滿歸塗

開平夏日言懷

土屋嬰燈板榻虛一鉗一鉢似僧居半編翰草從人讀

兩鬢霜華向曉梳客子衾裯殘夢短暑天風物暮秋初
故園松菊荒多少豈不懷歸畏簡書

郊送雲叟公

寶鞍塵土滿香羅因送行臺振玉珂出郭快於鷹脫鞵
歸懷爭奈轂移窠夕陽明處亂山淺碧草深時毳帳多
自恨囊錐無利穎青雲臺閣半常何

直中書省

紫禁彤廷尺五天沉沉碧綺鎖秋煙鳳池波暖鏘鳴珮

翰苑才疎愧昔賢
人世好懷能幾度
風埃長路已三年
綠陰好在西園樹
辜負移牀聽晚蟬

開平晚歸

七月一日
授翰職

龍首垺邊野草深
秋風灑水動歸心
百年蓬巷開圭竇
一日恩光照士林
吟鬢有光浮鏡玉
家書封喜認泥金
料應曉月簾櫳底
乾鵲飛來報好音

弔竹

三徑歸來已就荒
更堪庭實歎云亡
窓間月出思清影

簾底風來憶細香便擬碧蘚留嘯詠恐應塵滓到膏肓
未容分斲蒼苔破拄杖敲門有底忙

和龐參軍雲卿詩韻

萬事雲翻總釋然不禁哀樂近中年此身得處便為樂
自斷從今不問天最喜遇知傾底裏譬如食蜜味中邊
吾鄉賴有諸卿在歸隱終期覓魯連

送陳尚書經畧成都

暫辭喉舌去籌邊調餉中間別有權拓境要當成算後

務農思在訓兵先雪山已覺公來重玉壘休誇蜀險偏
東北更看諸葛表春風晴霽錦江煙

太原筆工李子昭許贈予雙筆久不見付作詩
以問之

子昭過晉喜新知雙筆親承遠見遺脫帽一從休老穎
臨池幾負躍鰲躋正煩筠管簾於臂細理毫髮健作錐
久向夢堂驚五彩貯雲含霧莫來遲

聞諸軍飛渡鄂渚前次建康

節駐長洲已浪傳鐵鉅鎔冷瘴江煙膠舫浮海從南道
潢日行天總北旋牛後舉知非晉祚厯期應訂遇唐年
至元天子如天覆莫遣虛陳坐榻壇

秋日會牙城白雲樓讌行院使者及嘉定府新
附諸校座中觀西山風雨

望際煙霏溼翠屏雄風先作雨前聲鴻濛氣合先天境
慘淡州迴得意兵涼吹遠隨悲管發壯懷還傍醉吟生
三年畫戟清香地慚愧終童繫越纓

賦西域鸚鵡螺杯

老月淪精射海波珠繩分秀貫神螺鷗斑漬粉垂金薤
鸚喙嫌寒縮翠窠樽出癭藤紋浪異瓢成椰子腹空皤
飲餘疑與溪娘遇一笑相看發浩歌

乙亥夏六月念四日西城即事馬上望姑山煙
雨濃淡開闔有不可端倪者偶賦是詩以紀其
奇觀云

連山中斷鬱蒼陁全晉蟠紆未了青方訝野煙沉澗壑

忽驅涼吹滿林垞天邊雨脚排銀竹物外仙家列畫屏
擬是姑仙遊八表笑迴龍馭下滄溟

挽翟器之八月十七日清晨夢翟君器之晤言
者良久覺後賦此以悼魂而有靈恐當擊節也
淡癖相看忽四年襟期樗散鄭家虔隸書思入銀刀法
畫品人推具眼禪滿壁滄洲驚絕筆一樽別酒是終天
不須更聽山陽笛日暮懷人已慨然

哭郝內翰奉使

大河東匯杞連城之子南來器宇盈義契重於平昔友
新文公與後來盟苦心問學唐韓愈全節歸來漢子卿
十六年間成底事長編惟見使華名

次楊子英詩韻

十年芸閣想差肩曾侍紅雲尺五天幕府蓮波知幾泛
麟臺勲業浩無邊劒埋古獄終衝斗玉蘊藍田煖自煙
留取胸中疎俊氣他年揮手障汾川

題開封府後堂壁

至元十三年被省院檄同開封尹陳侯試河南儒士
四月十九日抵京授館開封後署相與握手話舊且
及包范二公事業時予耳疾止酒談噱間暮雨大作
連明因述鄙語以奉一笑

使輶南下入京華滿眼交親笑語譁共訝老螭蟠北海
自憐賤子宿南衙關河痛別襟期豁風雨翻空夜氣嘉
負殺清樽三百爵胡牀相對看簷花

投宿洧川驛

時病耳

話長不覺道途修馬轉河堤入宋樓時事未容談笑了
故園誰遂去來休一天梅雨方初夏兩耳蟬聲已入秋
最喜此行陪逸駕未妨吾道付滄洲

許昌道中

一雨長途送曉涼陌塵壓盡燕泥香醉歌金縷辭梁苑
笑拍吟肩入潁昌人物消沉清議在風雲開閣野煙蒼
應憐一片西河水空照行人兩鬢霜

潁封人廟

在宋樓鎮西三里古堤上至元十三年夏四月考試
河南同陳節齋過其廟陳為索賦故有是作

穎封遺廟枕高墉窈窕丹青戶牖空治道得人無國小
孝心錫類與天通當年大隧融融樂此日喬林凜凜風
總道茅焦賈餘勇從容難似片言功

友人喪馬

老驥龐然燕色蒼今春常記遠乘將翻江風雨曾何夢
伏櫪飢寒想備嘗既乏敝帷酬逸德忍令銅馬葬人腸

玉鞭剪斷春遊興
驢背清吟要細償

南陽府試院中作

牙堂瀟灑敞晴疏
薜牆深五畝居
起敬對瞻元凱廟
訂頑欣得鶴山書
心非道義為充實
身與乾坤恐自疎
暮望城闌還一笑
竿頭蚯蚓引鰲魚

寄李士觀

拌醉清樽洗別顏
我來君往轉淒然
遙看漢水無三百
不覲青揚已五年
甕舞未收輸鬼笑
候蟲多足反夔憐

義襟誰似張京兆早為吹噓使北旋

京兆謂張好古時在襄陽徵理錢穀

等事

南陽北城同陳節齋晚眺

大野東豬楚塞遮清川西驚抱城斜瓜分鼎峙連三國
地闊天開到一家丞相大名垂宇宙龐公高節動雲霞
千年事往空遺跡立遍殘陽數去鴉

宛葉道中

六合雲蒸一氣霾漫漫長路渴生埃詩從白雨明邊得

人在青山盡處來世路有機難預料劇談供笑不時開
濟時賴有諸君在漢苑秋風愧不才

次宿汝樓韻二首

解却征鞍細履園月明深夜倚危闌會慳共惜飄零久
心遠應憐話語殘尚友共尋佳樹傳逢辰不戴鷓鴣冠
傾囊擲下驪珠領依舊晶瑩照乘寒

微雲河漢半晴陰夜景蕭森夢化成山色不隨喬木老
月華偏對故人明鶴緣露警清無寐蛙屬官居重有聲

廊廟只今紛治具正容堅坐看昇平

贈別按察王立夫二首

時在洛陽
試院作

當年畫省憶同襟此日南來又盍簪
夜雨喜成連榻夢秋霜尤見故人心
義方外覺紛華遠話久中傾底裡深
他日買田相約老兩椽茆屋共雲林

眼中機括審時張事外論量見直方
白璧不酬金屑璧烏霜能護豸冠霜
煙花紫禁期推轂風雨南州夢對牀
更就信陵陵上月一樽分手上河梁

留別節齋公因次嚴韻

雨露乾坤不少私至人出處與同期
松筠冰雪有定操人物江山見一時
着手正便捫蝨話看雲難受絡頭絲
平生慕藺公應識秋水長河有令姿

夜宿朝元閣下

禁垣樓觀天中央星斗拱列靈壇蒼
月中清露翻碧瓦殿角冷風搖玉鐙
炎歊似殺赤縹怒霧雨漫成玄豹章
時考試儒士於此故云長纓土滿未
容濯金溝泛曉空蒼涼

挽呂權漕子謙

維至元十年歲癸酉夏六月

閏

日江淮都轉運使幕

官呂公終於私第之正寢享年六十五越明年春二月東平尹信弘毅自衛過晉始知公墓草已宿嗚呼哀哉公諱遜字子謙系出東平望族父松金詞賦進士第官至隰州刺史興定間城陷歿節公其次子也為人疎直愷悌樂道人善早歲有賦聲生平喜作詩格律精嚴長於七言近體或有問須盡吐乃已然如

法家斷案不絲髮貸問者知所趣居漕府幾十年良
謀默計便公私為多某辱知最厚悼斯文之不幸痛
知己之難遇非歌詩無以攄予衷也乃作是詩告公
墓左魂而有靈鑒茲誠悃其辭曰

凌烟詞氣呂衡州一語神交二十秋漕府議高推獨步
詞壇吟苦入冥搜眼中耆宿有今日地下周馥是舊遊
秋草滿丘新呂道未容車過淚先流

臨武堂宴醉後有懷省臺諸公

桂月流光雪滿臺月明人影兩徘徊行雲不逐歌塵散
往事還隨去鴈哀雙鬢入秋無可白寸心於世未全灰
遙憐紅藥堦前客玉樹相依一笑開

簡寄陳節齋

別來碧海三山客偶得新詩慰遠情書接夜談懷鄧鄩
風荷煙柳夢都城好翻故里三千牘且按秋風九萬程
最喜新涼換炎暑梁王臺上月孤明

鞠餘望月東臺即事

崕陴詰屈張煩疴老樹遺臺悵獨過山色滿樓簾影薄
柳陰橫沼鳥聲多兩河蓄潤開東雍千古秋風動漢歌
誰著梗陽人有獄鬢華尤比向來皤

日用

萬彙何能臭味同洪纖強梗貴沖融屹於砥柱標天險
淡似浮雲度太空意或近私隨有礙事因無已即成功
莫將此理求諸遠總在平時日用中

送王丈子壽南下河中

白髮今年八十過故園歸興足蹉跎啟期三樂人爭仰
汲直高風古所多照眼關河增喜色過門香火盡行窩
後期望嶽棲岩上一笑雲煙入浩歌

郝提舉子某至元八年冬見於京師楊氏書院
與之語溫醇有禮愉色睟然意謂奉身周謹篤
於其親者也今年春予官平陽一日介吳君子
明來謁具道郝南還之事相與擊節嘉歎久之
噫方良俗頽波中其孝養有如此者孰謂曾閔

之門和樂之氣有時而息邪此心不匱豈特錫
類而已哉故傳曰惟孝友於兄弟施於有政其
是之謂歟喜為賦詩以贈且廣其敬養致樂之
心色難無違之旨云

古稱百行孝為先就養辭榮事更賢戀戀庭闈心向切
依依親眼望來穿蓼莪報德歌周雅令伯陳情感母年
哀俗陵遲有如此見渠福祿日綿綿

白樓晚眺

條山東峙畫屏開樓外長河一線來
簷瓦蘸波駕夢渚鏡奩空影月臨臺
千年事往情如昨滿目春傷恨未裁
更著野花留寶靨女牆隨意點晴苔

洪洞道中送客回有懷子初舍人

親朋零落故人稀白首相望天一涯
花底夢歸連夜酒柳邊情在送行詩
賞心歲月能多日人物江山又一時
許國壯心雖未老向人孤抱欲誰知

公堂即事

雁鷺行趨日出前潭潭槐府靜秋烟漁陽摻急三搗後
簿領山如萬慮旋圖報每虞遺少愧焦勞何敢獨稱賢
更堪清畏堂中夢夜夜歸心到日邊

清畏自榜
寓居堂名

和周錄事感春詩韻

微官休苦日奔忙須信行藏在彼蒼心計自憐嘗越膽
鬢花何計避吳霜暫容巾挂三花樹任使聲喧百鳥場
昨日平湖湖上過綠波如縠要浮觴

夏縣道中

溼雲壓樹際岡平溽暑還因小雨增官事困人如縛虎
秋風吹野夢翻鷹趨時未必儒冠誤並隱端為野鶴憎
遙憶筠溪亭下水萬竿蒼雪照吟燈

題聞喜廟學古柏

世傳清廟聖湯墟老柏環除十六株黛色青煙千古上
石根銅幹百城無虬龍閱世蒼髯磔踈影凌歊冷翠鋪
眇汝自慙詩禮客摩挲三向孔庭趨

送張子文驛送戈甲前赴成都子文雲中人至

元八年冬相識於大都李玄暉南菴

吟君一軸餞行詩西望峨嵋有所思山險不憂已道路
雨多防溼漢旌旗雄邊有策堪回奏諭蜀能文正及時
儻見總戎煩告語雪山輕重有謀為

總戎渭彥
清軍帥

寄送朱信卿還吏部

故都喬木已蒼烟

朱翼城人故都謂
翼唐叔故都也

玉樹臨風照眼鮮

暫着印窠封瑞錦要從鞭箠看流錢燕山夜月縈歸思
平水春風夢別筵不得一杯光祖道汾岡回首轉悽然

霍岳道中

郡僚招致遠相過冒雨乘登荷笠簑比入廟宮三渡水
再尋蘭若重攀蘿傍山涼早疑秋近碎澗溪喧覺雨多
庭下古碑堪晤語倚餘筇杖更摩挲

謂劉神州
修岳洞碑

霍邑懷古

堂堂義幟下并門六合風雲已併吞軟甲不憂三日雨
妖氛唯厭兩都昏緬懷戍火城頭語死愧忠精地下魂

謂宋老
生也

慘淡鑿鈴原上月至今英氣凜生存

送周錄事幹臣任滿赴都

青衫白髮老參軍
銀管聊鋪兩考勲
公吏檢身知禮度
兒童爭語說清勤
春官吏選多書最
祖帳東門惜重分
匣劍莫將塵自翳
諫章論草要新文

送漢臣張弟

青青衿珮讀書郎
邂逅姑汾意巨量
老大正深鄉國念
飛翔不負少年場
行沾紅藥堦前路
夢到秋風豸角霜
此去固當強不息
更須人事卜行藏

壽趙祕監輔之時奉使日本回西歸京兆

報國心丹氣益振一帆直徹海東垠三年契濶中朝客
百險歸來萬里身曠古使華清議在照人精彩壽臺新
終當清淺逢萊水經制金華要老臣

陳季淵挽章三首

至元十年十二月望陳季淵子次翁道出平陽以其
父季淵喪來告且請詩哀挽故勉為賦此

筆頭詩話硬盤空詩自工來老更窮玉斧驚傳修月手

旦評推絕斫雲翁幽穿洞穴愁山鬼壯極秋濤駕颶風
千古杜陵原上月一丘分照渭城東

大駕西巡始拜公從容樽酒兩都同杖歸河朔忠尤壯
詩到秦州氣更雄蓮府晴波奇策在杜陵殘月草堂空
傳家儘慰元龍望湖海諸郎有父風

憶扈龍旂狩蜀年渡江詩並選鋒先江花冷墮波神泣
醉袖來披玉井蓮已訝羽淵淪老月遽教風骨閔重泉
緬懷春草池塘興雨夜分明夢惠連

挽殷僉事獻臣

扶病南來喜益簪
激揚似為失前禽
氣衝牙角空餘烈
響絕朱絃得好音
一節儘高完璧事
百年誰了蓋棺心
醉魂不到黃壚夜
夢繞三山碧海深

微恙

蒲團倚煖病維摩
春滿晴窓氣未和
兀坐暫容心境靜
好懷安得故人過
鐵花銷澀青萍暗
世事栽培白髮多
却喜郡人相說似
春風門巷雀堪羅

至元十一年歲在甲戌上巳日會府倅張侯明
卿治中呼英甫總判張行甫禊飲於晉源鄉蘭
莊刁氏之醒心亭張侯行甫之子思誠息翁孺
侍讌

禊飲蘭亭不可尋蘭莊山水儘清音楊花糝雪溪流碧
野卉留香竹樹深暫脫帕車三日婦却憐時序百年心
一樽恰趁芳時醉明日池塘是綠陰

次日奉命燕南征新
軍中外騷然者數月

送郭案牘彥實

東西南北送行頻長路青山輾欲塵蓮府有聲推雅望
柳條無計絆行人綠波未要傷春浦白壁難貯入幕賓
後夜月明川口道夢歸先到晉溪春

洛陽懷古

重城繚繞枕印腰二水交纏會洛橋勢即土中多漢制
錦園林苑訝隋妖山川開闔悲今昔陵谷更遷失市朝
萬古消沉竟何有總成閒話付漁樵

遊澤州青蓮寺

知州事
皇甫琰

薰風吹雨不沾衣
馬趁清涼入翠微
破石兩楹天斧斲
好山四面畫屏圍
我來勝地清心地
僧說禪機與教機
剩有文章賢判府
徘徊登眺久忘歸

斜分一逕下林巒
金碧觚稜紫翠間
羣嶺秀攢青茁茁
孤峯突出玉湖山
鑿開一握乾坤小
占斷千年日月閒
浩浩兵塵滿河朔
天風吹不到禪關

和前韻

盤盤石磴轉層巒
寺隱青蓮六葉間
天削斷崖開老硤

雨將空翠繪蒼山偶因戎治終朝畢暫得僧窓半日閒
清曉出山還一笑幾時塵事不相關

覽勝都忘帶葛衣溪風吹雨散霏微霞明殿脚金千界
雲抱山腰玉一圍林壑有靈憐俗駕人心無路息危機
風流幸對文章守安得岩棲不更歸

夜過關嶺山

山行四月似涼秋夜半搖鞭下嶺頭心苦自憐嘗越膽
歌長不用換吳鉤風煙動色開中鎮禾稼連雲際四州

碌碌一官成底事春風歸夢仲宣樓

虞鄉道中

中條如畫色蒼蒼過雨晴嵐帶夕光望入王官饒水竹
路經虞坂足耕桑未容岩桂相招隱自笑微官有底忙
多謝曉風驅暑退笠簷吹作馬頭涼

謁王官谷唐司空表聖祠堂

人去空山草木香撐霆非為漢文章三休方擬遺身累
一債應憐為國亡明月不污黃浪濁清風高並首陽芳

滿斟三詔亭前水拜乞襟靈滌肺腸

慶路伯達八秩之壽

素髮酡顏八十春昇平人物典刑存兩都喬木秋光老
四座春風笑語溫膝下盡歡衣有綵人間無似壽為尊
試從九老圖中看獨覺光榮萃潞門

為鄉人壽

壯年虎穴喜竒探老去幽潛一道龕倚杖看雲追往事
閉門留客了玄談開元氣鬱丹浮頰鬢髮雲如綠滿簪

今歲壽堂春色好一簾空翠撲晴嵐

秋澗集卷十五

欽定四庫全書

秋澗集卷十六

元 王暉 撰

七言律詩

壽總管陳公

當年劍履上星辰
諫草曾蒙帝子恩
天上聲華瞻北斗
人間詩價逼西崑
儘培桃李開春苑
暫遣風雲擁戟門
誰識節齋清白節
西山晴雪照吟樽

一作洛下梅花洪上竹兩都無地著

春
温

斗間占氣試龍泉兩歲公堂拜壽筵
河潤已歌千里遠
化行皆自一身先
鈴齋畫掩無私謁
坐榻朝懸有敗墮
愷悌我知神所相
隨山喬岳未為堅

黃陂曠度吞秋壑
卿月光輝炯士林
萬目刺裁無錯節
一生匡弼有丹心
行春不識甘棠訟
濟旱終為傳說霖
萬斛明珠百泉水
光風多付壽杯深

清明日拉友生李士觀遊長春宮因謁純真王

鍊師具晤姚左轄商僉院二公高論時至元八年二月十九日也

鳴珂振轂滿重城
花底春光沸玉笙
放眼壺天如隔世
侍談仙馭勝登瀛
松風韻瑟金鐙靜
竹露光寒鶴夢清
且莫臨行門外去
夕陽正在總真明

總真閣名

送陳按察東還

把臂論交今十年
竭來蕭寺重留連
已驚秋漢盤孤鶻
更愛清吟障百川
桃李春風寒食月
關河行色繞朝鞭

比來論列尤清峻愈見行身不偶然

追挽省郎王仲蔚

毳幕風翻雪滿牀快書初不減元康酒餘綺席永生頻
事解連環穎脫囊青鎖飛翔天已老白雲迴笑恨應長
杏花春色鄰牆酒前日東城是醉鄉

寒食日韓氏南莊讌集

重城鞍馬壓紅塵春草池塘發興新自擬嘯歌知道在
不分賓主更情親青山似喜談時事白髮空慙滿領巾

無數向來投轄飲不應驚座獨陳遵

贈李濟之修撰

久扈紅雲侍帝興襟靈瀟灑氣冲愉絲綸有在人非偶
寂寞求音意更殊已為斯文鏗木鐸共驚滄海得遺珠
何當一片鑾坡月特聽論思為捋鬚

簡寄王推官漢臣今從事彰德幕府表弟韓從
益雲卿自相下來伏審雅候佳勝喜慰之餘謹
以此寄奉別後一笑也

燕市分攜已半年客來首問喜清妍便教綠鬢看吟鏡
儘稱清波泛幕蓮五袴有歌清議裏一方無事晚燈前
西溪未減東湖勝滿意湖山照酒船

和趙明叔言懷

我初識子禹卿筵秋月金盆上碧天翔集栢臺幾二載
稱停文賦每終篇孤忠自信恒多苦萬事安心恐偶然
白髮行年四十五向誰重理伯牙絃

餞陳僉省行臺西夏

家條

鵬搏九萬見扶搖五郡河湟付燮調
版籍輸誠須實守
孤寒收淚拜文饒天開相府宮儀肅
方挂崑山節制遥
荒服旬綏談笑事太平勲業在中朝

一作如對軒墀問時事尤宜先為漢

虎落雲間四海家湖山初不外幽遐
龍荒要闢朝天道
別淚休驚出塞笳葛亮貴和書有在
君魚砥節老彌嘉
多應青礧城頭月無復驚飈漲暮沙

漢家威德際髦鬣芽蘖其中慮阻艱
金節遠開丞相府

春光先渡玉門關正煩烟火通青海未用梯航致白環
銀字詔還知不遠好來彈壓紫宸班

五郡河西右臂連懷柔有策得人先文昌除目緊誰在
帝座回章得汝賢才氣似公當重寄睽違多感是中年
黃金臺上西山碧莫厭離觴碎筑絃

勅勒川南磧鹵西荒烟回望隔華夷哥舒開府固英特
老范籌邊貴靖綏漢月流光清朔部陰風無力動牙旗
遙知別後相思夢秋鴈聲中第一詩

張夢卿惠奇石

一峯名秀華蓋故家物也
拊玩不已作詩以寫其真

道人解種孱顏玉分供晴窗思渺然夢去恍為天姥客
潤餘猶帶鬱林烟夏雲翠聳形模怪海日紅蒸腹背鮮
我自愛觀無巨細一卷嵩華墮吾前

考滿日言懷書呈侍講顯軒

三載區區簿領間癡牀老坐待循遷封章不到回天筆
躬稼終歸負郭田羸得虛名清議裏儘驚白髮暮愁邊
只應一片金鑾月似向衡門照獨偏

題李鍊師崇聖宮圖姚左丞索賦

滾滾勞生汨世緣鍊師獨得靜中詮一篇秋水忘言處
滿眼青山曝背眠丹井流光傳大藥玉臺積翠倚中天
方蓬別有凌風鶴華表歸來又幾年

夏日讌集田氏林亭御史諸公留別

溼雲壓樹罩方塘雨洒層軒滿臆涼四海交遊有今夕
一樽情話惜離觴夢驚紫禁烟花老醉盡佳人錦瑟香
老子興來情未已更催銀管按清商

聞丞相史公受開封之拜

并引

昔鄧禹列侯特參大事晉公入覲重領台司故韓伯
拜章稱舊歷三司之貴雲臺圖像獨端居諸將之先
伏惟開府相公佐翊勲高封拜寵數以今視昔前後
畧同養老乞言典常尤異伏自傳聞之審不勝慶幸
之心敢綴荒蕪式申頌禱前監察御史王惲謹頓首
啟上

台鼎春回極寵光初聞歡喜倒衣裳百官禮絕汾陽拜

炎運天開漢道昌義激忠精傾列辟坐調風雨會中央
此心久寄華亭鶴夢繞裴家綠野堂

御史秩滿日效樂天詩體書懷

人微每愧居清要祿厚常憂負素餐勁翮已輸鷹隼健
秋霜空落簡書寒寸心敢謂行身了世運彌深以理觀
三尺素琴中本靜又施絃索向誰彈

上太保劉公詩

中統二年

閒雲出岫便從龍羽翼高于四皓功黃石有書開兩漢

黑頭無地避三公金輪散影連沙界太乙浮光動竹宮
鉗鉢不妨聊爾爾人間桃李滿春風

山人

較來鐘鼎與山林得失何勞拊髀吟靜對清溪忘俗慮
醉逢漁父是知音滿梳華髮常年雪一片閒雲欲雨心
臨水幾堆黃落葉被風吹去任浮沉

王子行年四十餘幽潛心似參中魚倦談時事便情話
靜盡靈襟信理書遇酒祇堪知味正愛吟誰暇計才疎

今冬處置行窩了種竹溪南有草廬

和郝子貞見贈之什兼餞舟行二首

情話滔滔不易量幾年閒處看人忙時清共樂林居好
理到能消客氣狂脫穎我慙成事遂論詩君乃起予商
布帆無恙秋風裏一棹烟波去渺茫

山人何苦住山城老雪堆門幾度平雅愛雲林無俗態
豈知塵土滿長纓薄田粗足充饑了衰俗無依奈物輕
三十年來老知己此回相送最關情

題韓通甫城南別業

翠竹連村映白沙橫岡細抱一川斜橘林多實長年樂
棣萼留香盡日華雲錦池邊看鴈序秋風門外任蜂衙
自憐獨鶴歸來晚夜夜林丘夢水涯

送子初宗兄出鎮關臺

飛翔方喜邁朝班一表陳情動日邊列郡剖符聊復爾
中年分手倍悽然兩鄉憶望三千里一席親情四十年
明日萱堂壽親處杏花紅點綠楊烟

登臨武堂

吏散公庭百慮衡來登臨武敞高情唐風過陋留遺儉
晉謫移民到健爭千嶂壺山吟際晚一溝汾水眼中明
悠悠自愧沙鷗雪便道忘機意亦驚

唐山道中早發

時至元九年三月初九日自燕達淇上

沆瀣橫空夜向分行穿林影認前却夢殘旋逐車聲破
人困時牽馬足奔常笑未容耕隴畝一官隨分報君恩
獨憐三載霜臺月空使流光滿薊門

懷舊詩

并序

至元九年二月十四日濟南劉漢卿出示亡友王仲
蔚詩軸三復之餘慨焉盡傷因憶往年任東平時與
仲蔚諸人暮春之初會飲于宿城野務趙媪家凡三
次歌酣盡懽同會者六人明日仲蔚賦詩有楊柳青
旗連坐榻杏花春色過鄰牆之句殊為上軒所賞明
年仲蔚從事濟南幕府予亦西歸淇上自是而後不
復相見秋七月聞仲蔚病疽死厯下忽覩斯作令人

又有短氣者七年之內六客者止存并任與予三人耳因為賦此以抒梗槩云

遺詩一讀已悽然玉樹臨風墮眼前心擬酒寬終致疾
壽隨中止欲誰愆蜀川寄遠猶如昨伯道無兒更可憐
轉首惠連春草夢月明愁滿宿城煙

辛未歲除夕言懷

此月廿八日尚書省復併入中書省

杯盤草率具錫茶燈燼紅垂夜半花抵掌不憂韓愈鬼
住京空在老坡又素餐御史雖無補畫省除書有底差

新故送迎常歲例春風明日又誰家

大暑

大地洪爐一氣蒸樓居臺處失高層庭柯葉靜風來絕
河漢陰斜氣未澄炎帝戲張千傘火老懷思抱五湖冰
砮砮瘦廢無多力遽爾蒸騰恐未勝

挽王修甫

時客死于燕君有燕都懷古詞內有恨滿西山秋色
之句至元元年在東平時屢向余道

大梁東郡衛南廊尊酒論文幾度逢
少日才情驚小杜
中州人物惜元龍
長歌老驥壺空缺
秋色西山恨轉濃
五十五年成底事
一丘露草泣吟蛩

奉陪左丞張公尚書李公王學士圖克坦待制
赴禹卿觀稼之會偶得五十六字奉林下一笑

至元七年
四月三日

韋杜城南尺五天
草堂尊酒接歐韓
晴雲望遠禾方秀
高樹涼多露未乾
臺館不煩題綠野
林花時許覆金鞍

因君喚起歸田興夢到西溪舊釣壇

遊玉泉山

山腰一逕轉雲蘿照眼平湖漲碧波形勝左蠡遼海遠
風烟還覺玉泉多自憐俗駕來逋客急遣清樽發浩歌
笑拂巖花醉歸去山林鐘鼎兩蹉跎

書懷兼簡陳節齋

羞將勲業鏡中看不為無魚動鉞彈兩鬢總隨霜簡白
寸心虛傍日華丹閒中持論談何易事際操存衆所難

羨煞山東陳按察龍光高射斗牛寒

題趙宣撫樊川山中雜詠

蒼崖如削靜烟霏中有高人住翠微
夜鶴聽琴依蕙帳曉泉和月落山扉
一龕靜體炎涼理兩眼深明倚伏機
畢竟名高難久卧野猿偷褫芰荷衣

歸潛洞

眼冷朱門鶴蓋陰自開幽洞事幽尋
飄蕭書劍三秦客盤礴風雲萬里心
竹澗度涼便夏永藥窓留暖愛冬深

何時為濯長纓土丹竈茶煙共一林

趙樊川

適安堂上趙樊川
擇勝樓心以樂全
神武門前拋組綬
終南山下買林泉
蘭臯秋遠縈吟思
釀甕春香引醉眠
洞口野雲遮已斷
不須重上武陵船

適安堂

草堂卜築近清溪
擬散襟顏似紫薇
幽事相關常起早
老懷能遂任時違
無心出岫和雲卧
有客過門盡醉歸

聞道黃家花滿樹幾回扶杖到斜暉

趙公泉

故侯植杖得新泉寬鑿方池漲碧瀾
恐泛落花歸別澗要傳清響入幽彈
竹根漱冷紫林曲蔬圃澆餘到藥欄
已與山中留故事一泓難着老螭蟠

未央硯為趙明叔賦

萬瓦垂雲映碧虛未央雙闕想雄圖
天荒地老千年後玉潤金堅片月孤
微物偶因題誌重鉛華留借筆鋒濡

一樽難洗興亡恨要發幽光賦兩都

至元七年庚午奉陪憲臺諸公闕下賀正口號
盤盤帳殿敞彤廷天仗宵嚴擁萬靈玉筍東班分列辟
龍墀首拜認前星煙蟠鼉柱霑吟袖樂泛仙音近御屏
歲歲大酺恩例溥自慙虛薄仰皇扃

贈相者陳士廉

我游都邑已三年無畧匡時待罪愆有問試從陳子決
取徵還似客師賢

客師表
天綱子

紛紜半是墻間客高下能公

吏部銓兩眼羨渠明似鏡月評從此索心先

為遼人劉信甫慶八秩之詩

素髮酡顏八十春
豹韜還是總戎孫
兩都喬木清光老
滿座春風笑語溫
膝下盡歡衣有綵
人間無似壽為尊
須知善積餘嘉慶
三世何妨是將門

同馬才卿暇日登昊天寺寶嚴塔有懷

高標直上跨蒼穹
物外方知象教雄
九陌市聲開曉色
兩都喬木動秋風
遥憐漢馬屯湘渚
安得長書附去鴻

寂歷邨墟野烟外誰家簾幙夕陽紅

寄贈德長老

先府君無恙時嘗話河內德上人者系出貴族享年
最高行業極精嚴予以懷衛相望每思以披觀為快
迄未能也近弟誠甫至自野王云德僧臘已丑今年
百有一歲起居飲啖健若五六十人或問何術臻此
答云無有但休閒心無所用耳性嗜杖所依歸杖特
有瑰異者平生樂從賢士大夫遊無衲子氣象予聞

而喜之豈墨名而儒行者耶以韓文公有文暢登觀之作因書近體律詩簡寄西堂為他年林下一段閒公案也

一條拄杖老龍鱗扶掖西堂百歲春方寸已明老佛果典刑還是定年人笑拈貝葉隨僧供未省緇衣化洛塵我識阿師中所得溪光山色乃心身

至元己巳八月一日偕馬才卿游聖安寺

滿馬京塵壓市喧捨鞍步入給孤園金鐺響泛松風冷

寶月光凝瑞象尊法觀交纏雙井閑雨花別是一乾坤
布金不是芭桑計空抱危言吐復吞

謂讀明昌間郝侯
党竹溪蔡無可等

碑

閒院書懷簡胡員外應奉

束縛長纓領簿曹十年從事獨賢勞癡牀坐久疑禪榻
老木風嚴瀉怒濤行路總誇驄馬貴炬蓮何似玉堂高
一彈未就陽城草虛負秋空白錦毛

奉送大丞相史公行臺河南時用兵襄陽

封衛
國公

以平章政事副呼喇珠駙馬督視諸軍時至元六年八月也

無勞繞帳插生犀威德江淮草木知唐室正詔裴出將楚人休倚漢為池聘通上國非無補節駐長洲果爾為三百年來常例在忍令予槃舞嬰兒

寄陳按察慶甫

秋天寥落使星明光動山東百二城三本有書天下計一樽為約故人情九江虎渡非無術

山東吏人聞公至往往投劾告去故

云

漢節輪埋浪有聲老我簿書三萬卷幾時燒尾看雷

轟

跋王內翰與木菴唱酬詩軸

木菴詩筆唐文暢

一作老而妍

心印多從吏部傳豹管一窺

連壁句月牕慵展碧雲篇風流豈落明昌後真率當隨
靖節肩留取人間作遺像鬢絲禪偈話它年

追挽歸潛劉先生

我自髡髦屢拜公執經親為發顓蒙道從伊洛傳心學

文擅韓歐振古風四海南山青未了一丘洹水出無窮
泣然不為山陽笛老屋吟看落月空

繼張相言懷二首

山人蹤跡愧搜羅欲負虬松學隱和散木分甘遺匠石
薦章誰擬動常何畫叉活計青鳧少曉鏡功名白髮多
好笑住京王御史一官羈滯半年過

獸思深處鳥虞羅吾自人徒貴體和物有盛衰宜辨早
氣從舒慘奈時何眼前逕路黃門迅鏡裏功名白髮多

不盡一杯澆魂磊茶煙禪榻儘經過

和韻一作是傳
虬松學隱和

至元辛未冬仲廿四日夜五鼓夢衛南郊行夢
中得領聯兩句既覺為足成之

春烟樓觀照堤沙夢裏郊行日未斜幾片雲陰無俗態
滿川桑柘有人家微茫仙境雙鳬客依約春風一月華
興適正濃還喚覺一聲鷄唱喝簷牙

跋梁斗南先生無盡藏手軸

昇平豪富林泉主白髮歸來一幅巾世與士安籌國計

誰云開府是辭臣江頭宮殿千門闔物外雲烟萬古春
休向諸郎訪遺事青山依舊是比鄰

叔良西歸秦中感而賦此

倦客京師半載過翻成西去奈秋何
贊房燈影裁清夜渭水春風已白波
三虎自疑終致釋五噫從此不須歌
終南山色昭陵樹剩看新詩醉兩坡

兩坡

一作樂遊原上昭陵恨不暇新詩醉

寄李和甫見未央瓦硯

好在終南李鍊師未央瓦硯寄何時卧聞客舍三秋雨
夢繞畫欄雙桂枝孤月正堪遮老眼片言聊復慰相思
研磨縱對峨嵋秀中有漁陽萬馬馳

至元辛未秋八月廿八日同長老金燈義方暨
馮君用聶文超劉敬臣王仲通馬才卿石壽之
座主賈君叔良會飲于開泰之丈室約各賦詩
道盍簪之歡因為賦此

陟殿秋煙老檜蒼春風合座捲吟觴爭傾底裏心能見

不悵歌呼興更長風調縱輸韋杜曲新詩驚絕碧雲湯
人生無似新知樂安得車輪一夜方

壽圖克瑄待制

至元八年九月十四日

靜盡紛華道義尊立朝今復見經綸論交最厚先君契
提誨尤深賤子身世仰仲淹風雅在見來元亮性情真
一杯滿意得秋菊照映靈椿看玉麟

菊嘆

細菊言傳笑靨金結根失所最關心鶴欺力弱時來啄

草為藪荒日益侵寶檻移栽容獨秀秋香吟撚伴孤斟
朝來頓覺精神好似喜淵明為賞音

送臺掾趙明叔赴濟南迎侍母氏來燕

寤寐庭闈遠事承南陔詩裏二毛生悠悠望眼門廬月
戀戀春暉孝子情千里秋風吹去馱一天融樂美歸程
三升紅腐殘年恨老淚縱橫滿仲纓

一作零落悲風滿泊纓

壽房祖

至元八年九月三日

山立楊休七尺身接人襟度玉能溫慶流淇水宗支近

惠洽諸房德義尊扶健不煩鳩刻杖承顏幸備綵衣孫
一枝留在霜前菊細撚清香入壽樽

送李尚書仲實叅知北京行省

遼左要荒節制偏選材真得濟時賢拊循殊俗尤宜簡
調餉東兵貴有權軫慮可寬天北闕先聲應徹海東邊
顧慙知己謾馳嚮望入秋空鴈影翩

壽紹開外郎

十月十四日

襟期出處不多偏秀孖輸君六月先以義取交知己最

開談通俗見才全已將國計籌邊算會見嘉謨沃帝淵
相對莫嗟頭共白歲寒心在老彌堅

繼商樞相

襟期一見若同袍束縛微官笑獨勞方寸證明皆佛果
大千起滅總浮泡馳聲絕藝君能辯汨世天刑我欲逃
坐拂天花閱家數凜然清興雪山高

送和之簽山東按察司事

四道山東事最繁按巡當猛亦宜寬丘菑併在虛危分

根窟深連魏博間
風彩儘承綸命重
霜威何待栢臺寒
澄清快理征鞍去
望絕崦山與厯山

餞參政楊公出鎮覃懷

十載嘉謨沃帝聰
人間桃李幾春風
從今民事優游裏
轉見君恩顧盼中
寵節我知如李晏
救時人道似姚崇

洛陽三月春如畫
乘著新詩醉仰嵩

公廳堂名

送陳按察赴任山東

簡花霜落控孤應
暫覲清揚俗慮澄
四道規模開漢制

百城風采望陳登
露盤虛警青冥鶴
朔吹驚翻白錦鷹
回首相思定何處
暮雲春樹漢王陵

贈羅徵君

風骨飄灑到九還
一壺天地市朝閒
神游物表冲融際
道在平生出處間
笑看割烹要擎鼎
擬將忠直動龍顏
濟時好作商霖去
未礙經年別故山

孟待制駕之哀辭

我識先生二十年
當時遇衛亦翩翩
遺文載牋聞三語

一賦垂天笑八磚
幾日午風汾水客
一丘宿草茂陵阡
屋梁曉月驚無復
四望令人一泫然

祭子襄先生

先生隱德自崧丘
得號墻東四十秋
結駟退慚知道在
詩壇吟苦入冥搜
眼中耆宿有今日
地下雷元是舊游
幾卷閒書總帷底
未容拈讀淚先流

寄贈總管韓君通甫
暨弟居美
兼簡公弼良友
都門贈別柳條青
分袂南來歲屢更
三載愧陪驄馬列

久違轉見故人情每憐夜榻聞風雨羨煞韋家好弟兄
蚤晚細傾燕市酒誨堂重醉棣花榮

哭馬孟州才卿

名甫相州人

栢臺疑晤儘三冬暇日來陪御史驄寺閣納涼憐晝永
野塘轟飲喜君同性情遠出機張外禍福真成倚伏中
至元乙亥濬州同知未滿中堂見召既至以事
阻是年秋復除益州倅南還至邢病死壽四十久別已
增懷抱惡與君終訣恨何窮

哀大都督史公

名權中統初授江淮大都督

陽夏移軍入鄧封指揮旌壘氣增雄優居將幄元多算
威感荆蠻儘父風士樂死懷羊傳愛戰酣無大上均功
應憐千載龍驤業一慟臨江萬事空

題張府君坟丘

子僚字行甫曾
任官孫二人

龍公祠下府君墳岡勢西來虎豹蹲翠琰盛傳千事誅
青山還有讀書孫喬林氣鬱丘山重一水春涵德澤溫
白首故侯長健在繁須着力大于門

姑射北仙洞予既為新道立石且會諸君子明

日大雪仲明賢良賦詩光賀因次嚴韻以答佳
貺

三年判府苦無聲自信行藏付靜聽
翠琰銀鈎留故事
白波青嶂繞螺亭一官自笑頭空白多士相看眼倍青
每藉新詩深慰藉不愁歸詫草堂靈

王衛州挽章

公諱昌齡字顯之滄州人

堂堂大厦蔽雲居偃植圓權與藉扶
六縣耕桑深道愛
百年魚水應時需望歸王儉風流幕我識
鄴侯吏隱儒

河朔諸侯幾參佐愛君終始擅良圖

又

襟韻冲融器識先晚年風節見承宣經綸素抱調元事
綵黻長深作牧篇寒谷暖回衰日愛老夫愁絕劍門煙
殷勤尚憶臨歧誨惆悵城南是別筵

哭友青州判李叔

洄溪一入乃死別送我西行淚滿襟四海從師有先子
半生急難是初心泉扃不閤無兒感壠樹空瞻挂劍林

會擬並刊遺愛碣鄘城臺首御河深

古鄘邑在今州治東北一十五里與

君別業相對公常云本洛之上黨人五代間東徙居衛唐將李抱貞之後既任潞州乃修治其碑墓焉

別盧漢臣

男兒出處要無慚一意公家性所甘
吾子有才無不可老夫於世本無堪
痛連臂骨緣心苦耳變風聲阻坐談
劍佩趨庭君好去建章宮樹綠覃覃

挽杜徵君止軒

泰岱東蟠未了青文章公獨萃精英賦
方庾信才華壯

詩到樊川氣格清平日酒杯追散聖一生高節見陳情
風流想在齊梁席未讓鄒枚獨擅名

留別忽治中英甫

四年相待情偏厚千里分攜恨若何別駕見淹時共惜
當官能處我尤多輩流自是青雲器金印行懸瑞錦窠
調古自知終寡和青天白眼望君歌

秋澗集卷十六

欽定四庫全書

集部

秋澗集卷十七至十九

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官助教臣汪錫魁

謄錄監生臣許立堡

欽定四庫全書

秋澗集卷十七

七言律詩

奉詠大丞相忠武史公

萬國鞭笞走帝庭，堂堂爭識漢孤卿。
元勲高出麒麟上，曠度初無智勇聲。
麗景去翻髯影，駕柱天留在笏端。
銘白頭無地酬知己，痛為蒼生淚滿纓。

元 王惲 撰

追挽元遺山先生

文奎騰彩憶光臨孺子何知喜嗣音

余年廿許以時文贊于先生公喜甚

親為刪誨且有文章重于相權泰山微塵之說即欲挈之西行以所傳畀余以事不克至今有遺恨党趙

正傳公固在陽秋當筆我奚任天機翻錦餘官樣月戶
量工更苦心野史亭空遺事墜荒烟埋恨九原深

哭賈叔良別駕

今夏書來墨尚新並冬誰料訃音聞忍看玉樹摧崑火
空遺歌聲遏嶺雲氣會可能鍾厄例天葩似靳吐奇芬

拊膺慟絕華顏母老淚珠傾滿練裙

祭館主謝總管

老師英威上將壇愛君雍雅戴儒冠依依孺慕懷丘壠
煦煦交情出肺肝枳棘鸞棲終鍛翮蜀江梁險失驚湍
傷心最是蒲中客馬首歸旌揭素竿

叅政楊公挽章

公墓在河南府甲戌以事入潞拜其下賦是詩以弔

天孫機杼五雲章簪珥飄飄侍帝旁一札恩光慚賤子
予一命翰林修撰其詞頭蓋出公手有云行已百年清
無玷博學能文顧超絕之異材足鋪張于偉績

議在中堂望隆鳳詔絲綸美吟繞瑤臺雪片香欲弔風
流俱寂寞滿丘秋草近宮牆

挽張蕪省

自號順齋老人中統元年授太原平陽宣撫再蕪東平行省

漢庭冠劍擁羣雄曾建嘉謀沃帝衷白筆剛稜驚柱後
繡衣風采照河東鵬來近舍魂先褫麟出昌時道未窮
一櫬西州門外淚不應悲絕獨羊公

留別總府諸公

赳赳天馬五花紋少日能空冀北羣事梗不成旬月雅

材駕空抱四時勤情馳北闕烟花禁夢到西山日暮雲
一曲驪歌應恨別麒麟高閣總殊勲

單學士挽章二首

生平才氣浩無雙彭蠡秋連萬里江庭議儘高
清禁月苦心終對玉堂釭百年世契先君厚萬斛龍文筆力扛
最喜誨人曾不倦洪鍾無憚寸莛撞

時論生平愛賢縱橫條列果無前屈身為道思弘濟
遇事明言見惡圓韋杜去天纔尺五衣冠埋恨便千年

遙憐晚景山齋意地下修文恐浪傳

和劉懷州韻

二月燕城氣未華
添衣風起漫吹花
背陰凝慘松猶凍
藉潤含嬌草有芽
得失正須論定分
低回初不為謀家
長河有路通霄漢
誰遣孤星滯客槎

荏苒風埃老歲華
羞將勲業照菱花
暖催回鴈舒雲翼
寒勒幽蘭茁露芽
嚼蠟宦情無少味
轉蓬身世不知家
客窓一夜江湖夢
醉把長竿繫釣槎

蛛絲拂面喜生華
照眼青燈夜有花
雪屋苦吟饒客思
茶鐺寬煮試新芽
一官除後三移次
十夢驚來九到家
遙想西溪墳下水
碧翻瑤艷待浮槎

餞王全州二首

衛連鄘邶號交衝
比屋休驚未可封
鄉校廢來風俗壞
野田闢後歲年豐
租徭雖免離民衆
官府全更宿弊重
新政慮來無此切
正煩裁減與優容

二十年來舊使君
又瞻皂蓋擁朱輪
試評異政三王果

何似天姿兩漢循田里務從安靜了使軺誰計送迎頻
先聲洽久民情喜聽到隨車一雨春

同劉景融西園懷古

錦摘西苑正隆修大定明昌是讌遊海露恩波鼇抃首
花翻瑤艷雪迷樓三千歌舞繁華地一片風烟慘淡愁
興廢筭來無五紀至今靈沼咏西周

送高飛卿尹順德

朝家一革舊官空整整新除示至公善政擬超循吏上

寬恩却在詔條中如君悃悃無虛譽所至絃歌有實功
馬首快從紅旆去百泉花柳待春風

用劉景融韻答客問

寂寂從教笑仲華羈懷坐老竹生花新除海隔無從問
喬木春深恐有芽追迹昔賢慚下惠比量時輩愧劉家
萬家倘作無聞去枉說張侯泛斗槎

西苑懷古和劉景融韻

彩鳳簫聲徹曉聞宮牆烟柳接龍津月邊橫吹非清夜

鏡裏瓊花總好春行殿基存焦作土踏錐舞歇草留茵
野花豈解興亡恨猶學宮妝一色勻

踏錐舞名見景元
所錄金人遺事

瓊苑韶華自昔聞杜鵑聲裏過天津殿空魚藻山猶碧
水涸龍池草自春民樂尚歌身後曲弓彎不見舞時茵
絳桃誰植宮牆外露溼胭脂恨未勻

和虞帝廟弔古

分開幽野自虞分上海雄沉載厚坤玄德共瞻天北極
殿基空對苑西門蒼梧雲駕無從叫翠琰顏書固可尊

聞說二陵堪比德東風啼損杜鵑魂

和劉懷州韻

雨露中天日有華暖私幽圃亦多花事機不料先根本
顛木其能絕蘗芽老去戀時兼戀闕愁來憂國不憂家
幾多至者星邊客空望秋風八月槎

和高飛卿韻

錢郎滿腹好精神人物當年見絕塵常惜仕途知己少
不愁花樣入時新趙張而後材難繼李孟之間德有鄰

蚤晚青雲臺閣底楊何同作眼中人

春來百草解通神其奈淒風漲野塵一為化權無定宰
百般生意不能新柳含凍眼迷陶宅杏簇枯枝倚宋隣
和氣阻乖關治體仰空欲問待何人

別高屯田晦之

十年冠蓋幾相逢邂逅燕城讌喜同清賞已歌梨雪白
歸期休負牡丹紅千屯曉月鞭聲底一片田旌夕照中
自笑欲歸歸未得草堂無地著盧鴻

即席壽青陽學士

湖海秋風駐節頻
此來猶侶漢平津
如公今得無期壽
笑我還先不速賓
櫻筍厨香驚咄辦
江山筆健老能神
玉堂未羨台階貴
人道詞臣是重臣

和左山言懷韻

投獻王門非自謀
白駒雖白欲誰留
烏飛魚泳有常分
漏盡鐘鳴合少休
老驥志存終伏櫪
野人機靜不驚鷗
會依綠野堂邊隱
一抹青山屋打頭

遊封龍北麓

行近龍峰已稱心，栗留聲裏轉青林。
雨如散髮來無際，山似幽人喜見臨。
樹密連岡橫遠障，雲低隨馬布輕陰。
鹿泉益薄何慙厚，伴我幽尋到碧岑。

中溪書院

幽尋不為愛山吟，李相巖棲是賞音。
身世正堪閒處著，時情尤比嚮來深。
風烟物外開三觀，塵土人間望一霖。
山若有靈歆素禱，滿泓寒碧代孤斟。

贈知事劉大用

兩椽茅屋打頭低，中有林丘翠作圍。
無限雲烟供落墨，總從胸次發天機。
一枝湘竹臨江活，萬疊晴山照眼霏。
疇昔過門清話久，前身疑是米元暉。

即事

和王鹿
菴作

徹備虛驚已可懲，更堪行事日紛更。
創行有例推諸老，責備無端悚衆情。
遼海兵連思魏鄭，延齡麻壞見陽城。
窮愁正遠聞佳報，喜動皇都豈席生。

留別鎮陽諸公赴任濟南

梧桐葉上雨瀟瀟，有似留連助寂寥。
身世未容歸壑晦，羽毛誰欲見雲霄。
三年潯水人情好，六月齊州去路遙。
回首北潭花上月，時應歸夢到蘭橈。

經史總帥戰處

乾石橋邊野澗橫，分圍曾列亞夫營。
雲烟眼底紫蛇陳，草木風前有戰聲。
故壘按行傷往事，青山依舊繞孤城。
十年帶礪河山誓，輸與汾陽貫日誠。

閔子墓

聖門婉德亞賢顏季氏何知欲浼然三釜恐貽親老恥
一廛歸取汶陽田山禽容與和聲裏墟墓荒涼落日邊
兩下穎濱碑下拜滿杯秋菊薦寒泉

公堂言懷

勲業羞將鏡裏看遭時自擬寸心丹勉從仕版無微巧
硬著精神博一官寤枕夜長憂思悄公堂人靜雪花寒
眼中少事能如意管甚林梢又日殘

糟魚

霜刀截斷玉腴芳
暖貯銀罌釀粉漿
錦尾帶頰傳內品
金盤堆雪喜初嘗
解醒未減黃柑美
雋味能欺紫蟹香
一筋饜餘乘醉卧
夢橫滄海聽鳴榔

甲寅歲元日

癡絕何堪應事機
閒心思與野雲期
醜顏身世緣飢凍
覺老筋骸強拄持
馬怯力微朝進處
鳥知飛倦暮栖時
日斜凭暖烏皮几
靜看爐烟裊碧絲

挽杜止軒

貧樂能安貴不淫百年宦海寄浮沉
閒中今古資談具物外江山助醉吟
氣義見來先急難文章拈出更雄深
追攀逸駕嗟何及時向逃空得苦心

一代人文杜止軒海翻鯨掣見詩仙
細吟風雅三千首獨擅才名四十年
劍在不沉衝斗氣神游多了佳山緣
老天未覺斯文喪齊魯諸生有正傳

挽孟德卿

龍驤東下破吳年談笑從軍似仲宣亡國不驚三月火
捷書先動六朝烟當時籌筆何其發此日題詩倍黯然
湖海賢郎宜少慰光揚重見葺遺編

和張鵬舉詩韻

誰分先覺與凡民天理中來一氣春肯效寒蟄吟月苦
敢教宛馬列河神六經之外皆非學諸子以來宜有人
自嘆半生蟬蠹裏白頭無術動嚴宸

和張仲常韻

強顏陳力媿周任
闕盡當年得失林
白首逢時能幾日
虛舟相觸果何心
行身誰是無瑕玉
合志能裁躍冶金
退易進難吾道事
此懷更比向來深

賦白舜愈多月亭

海岱東開迴地寬
小亭千里入凭闌
一軒風露金莖溼
滿地瓊瑤桂影寒
興比庾樓宜不淺
飲豪舒杓肯留殘
使君未老風流在
八表神遊夢采鸞

何處人間不夜天
月亭高倚月初圓
玉壺光轉青冥路

桂影香浮畫棟烟一耀蓬瀛知海近滿庭金粟見秋偏
素娥若待停杯問愁絕當年李謫仙

遊佛首山開化寺至元廿一年四月八日挈行

者孫韃郎

盤盤石磴轉蒼崖山似青蓮四面開寺古說從兵後廢
官忙喜向靜中來半泓寒碧供僧飲一點烟螺認佛臺
我本婆娑林下客樹頭幽鳥莫驚猜

遊靈巖寺三首

行入山門已可吟，葱蘢佳樹總幽尋。
氣分嶽秀開金界，鶴警陰魔護道林。
竹溜遠縈雲磴落，烟螺濃並寺巖深。
喚回三十年前夢，此日登臨慰宿心。

余三十年前夢遊一寺其形勢殿舍

殆與此無異

路轉峰回墮翠窠，陽崖擁抱更嵯峨。
泉通碧澗來無盡，寺並青山永不磨。
林壑勝遊緣興適，乾坤清氣與詩多。
晚鐘似惜遊人去，遠泛餘音遶澗阿。

絕景亭高勝賞多，杖藜到處即婆娑。
巖虛應磬聲長殷。

寺古題名字半訛幾樹幽葩明寶供滿空金色下烟蘿
何時暫謝人間事放眼雲巒入浩歌

送世傑郎中奉使雲南

節旄堅駐海西陲奮自陳湯一布衣朔雪不辭霜鬢老
長纓直繫六王歸恩波重浹滇池浪赤羽何勞漢將威
想得諸羌迎拜處使華先動玉門扉

余按部奉高故人劉君之子持此詩來謁感念疇昔
已二十五年矣顧其紙札刊弊因為重書以遺之庶

幾孝標憐西華之意云爾贅筆如左

漢柏樹

蒼柏無城擁漢陵
閼宮遺樹鬱崢嶸
崔巍不植明堂礎
造物潛通岳頂靈
萬壑烟飛扶傑幹
半天風雨撼秋聲
白頭會見東封日
照映驚旂一色新

過沙溝店

高柳長途送客吟
暗驚時序啞鳴禽
清風破暑連旬日
好雨宜時抵萬金
遠嶺抱村回野色
行雲隨馬弄輕陰

搖鞭喜入肥城界桑柘陰濃麥浪深

長秋官舍

十載隨人戴豸冠望離清秩實多難一身許國無知己
萬事關心空汗顏花樣況非時制巧功名宜為老天慳
季鷹何待秋風起一夜歸心滿故山

觀光三首

十三年在
都下作

漢家宮闕碧苔堯六合同來不待招非此詎能隆上國
有臣何幸際昌朝光連帝極環玄象翠積中天仰鬱霄

葵藿寸心深向戀日華明處五雲嬌

大元天子壯陪京盡蔽燕雲作苑城彩鳳應門千仗肅
蒼龍雙闕五雲明千秋日月低宸極萬國衣冠拜統紘
蟣蝨小臣何所祝年年嵩岳聽呼聲

長樂宮成孽宋廷紫微垣外紫烟生明昌受款真兒劇
洛邑營周是小成正朔一家堯歷日青山三面漢金城
君王神武高千古緘口長沙建治平

壽鹿菴大學士三首

十一月
初一日

大節中流砥柱標高風孤振張吾曹眼中元老恩方渥
林下淵明氣正豪萬事縱心緣理勝三峰當面與秋高
玉堂更覺台星重蓮炬長看照壽毫

陽春門裏開新第魚藻宮中侍講筵晚節不緣三徑屈
高風終愛五噫賢雅懷老去從多可萬事諳來愈自然
千古六經常道在就中能契是知權

風節生平以烈聞詞章獨與大蘇親天人重為斯文主
甲子洪開壽域春行草縱心書愈聖歌詩吟老語彌真

穆修亦是華巔客肯把韓編付授頻

贈友人張彥魯

并序

友人彥魯別予四年今歲秋有秦中之行道出淇右時
予亦北邁有期尊酒道舊為數日留既而分歧就駕
次日彥魯復追及予於朝歌南遂偕與北上前次保
塞逆旅追念往事耿不能寐為賦是詩以贈且傷其
會合之靡常歡樂之無幾也彥魯諱著世遼東人
北邁南遊有定期半途回駕喜追隨心因年老便多可

馬信車前亦緩馳綠綺素深平日雅碧雲償盡向來思
一樽逆旅燈前話莫忘燕陲抵足時

趙州石梁

華表亭亭擁石麟車書萬里此通津天垂螭螭卷千尺
月吐蟾蜍隱半輪片石鞭來能濟險大臣當用合橫身
征鞍歸路明年事一片春風柳色新

三臺懷古

萬里三臺作厲階漳流東注若為哀才教逆叛羯奴去

又得癩痴帝子來紫陌衣冠森鬼樸芳華林苑墮兵埃
姦夷不獨西陵樹苟或穿窬止自裁

壽姚雪齋

散髻飄蕭玉局仙竹風松月共清圓雲間正際商霖後
學與能窺太極前瀛館寵光開壽域太平勲業在經筵
愍懃春雨堂前檜細結冰花點翠妍

慶宋尹母八十壽

樹萱堂背已憂忘金粉蓮苞貯靜香風景四時藏秀麗

慈顏八秩見康強賦中潘岳閒居樂詩裏燕山桂子芳
會看肩舁宮戶底更勝陳氏配東牀

贈鄉先生逍遙子

姓韓氏曾為
尚書都省

鶴髮飄蕭玉練顏一壺天地市朝間集芳有驗扶羸劣
野鳥知歸謝往還幽睡不妨紅日晚青山誰似白雲閒
會當華表歸來日重為留題方過關

送裕卿都司南還

前日翰林君送我今朝幽薊我辭君十年契闊凡三覲

五月重遊此重分世事有機難預料後期無恙要相聞
何時從北從東稼解綬歸來約共耘

任懷遠慶九十詩卷

朱顏青鬢萬金身九十康強是福人擺脫世紛隨所適
棄拋家事見何親花香北渚盤杯具月滿南樓杖履頻
更為武公歌壽德一溪淇水照秋筠

挽楊春卿先生

曾為衛輝
路勸農官

山澤臞仙老使君十年談笑接多聞襟期自是羲皇上

肝膽初無楚越分冀北羣空逢伯樂斗南名重見田文
一丘宿草情何極淒斷無終日暮雲

寄壽博山趙總管

予方從事東平日君適分符濮水濱歲歷喜聞開九秩
客來爭說好精神背鮐宛與龜紋秀面頰丹渝鶴頂新
特似麒麟圖上見形容全不老於真

壽平章張公

時為樞副
故著作之

十年黃閣富經綸落落蒼髯社稷身公道救時仍此在

龍門歸譽見來新菊香已辨南豐供綠蟻無煩靖節巾
壽席今年得佳語太平勲業在麒麟

送商台符赴行臺御史

器識沉明義外方青衫難屈校書郎暫虛東閣郎君位
要聳南臺豸角霜八道風稜馳使節兩淮殘困是維揚
就中驄馬吾儕事匡正官邪最大綱

病目書懷

效樂
天體

病眼何時視物疑更禁風火內交馳越蛙悍目將誰怒

蛟淚傾珠盡日垂氣鬱方函昏暈鏡滄連剛斂痛磨錐
悠悠伏枕三旬苦安得黃金刮目鏡

送按察王煥卿之任建康三首

滿移投上謝癡牀五郡河湟作省郎白筆冷搖瓜步月
綠橙香泛洞庭霜虛懷正切平時慮達變終垂後代芳
我老壯心猶未已彈冠端有羨王陽

十年臺省共翺翔機識沉雄義外方金節喜酬平昔志
綠橙香動夜來霜老懷雅有思深慮世故何憂事過防

眼看澄清開八道就中風動是丹陽

五郡河湟已有聲繡衣直指又煩卿恩寬注意務新集
附衆於今慮孽萌牛渚犀燃防過察吳江霜落要維清
行司此去猶堪喜地爽山高眼倍明

送李敬之按察淮東

遼陽三載淹廳幕并府終年戴鐵官桃李門庭慚自致
冰霜肝膽見來寒摧姦老手監司舊復業遺黎暮枕安
想得桐淮東畔月清光先照使君鞍

送馮壽卿簽事

小邑鳴絃踰兩考外臺簽事是榮遷未妨躡足青雲上
已著先聲白鴈前三世名家遺直在百城新附望恩偏
銀鞭莫緩青驄去野鷺羣飛正刺天

寄子初提刑自陝西改授行臺中丞治揚州

監司西去無三月建節東遷路八千仕宦得君當重地
澄清有路是瞻天霜封淮甸妖氛靜春入瓊花老樹妍
一策想能康濟了儘堪歸隱百門烟

目疾自警

效樂
天體

目手相須最切身連宵慘痛可傷神老緣貪得書為祟
壯為傷多酒入脣四大假來皆是苦萬般急遣亦忘真
悠悠未了三千牘束置從今不要親

寄梁幹臣簽事

滿移未貢別癡牀去作襄州省幕郎遷拜總緣才力致
激揚猶稱老懷剛離情轉惡中年別衰鬢相望兩鏡霜
每度思君傷馬甫漳州南望白雲長

壽趙同簽

九月廿五日

丙年正月下江東榮拜人驚此日同破竹固成王濬手
侍謀多見茂先工松形秀並眉毫健軍務能開世道公
壽席今年更堪賀廟宮修治越裝空

送劉侍御

超騰高品數年間遊刃恢恢顧不難百越遠開炎漢域
兩淮爭識惠文冠燃犀牛渚魚龍慘霜落吳江草樹寒
成事自來輸有志不教勲業鏡中看

雨聲

敲破寒更韻未諧
芭蕉未了更空階
隔簾響絕丁東珮
入耳愁生索寞懷
孤嶼有舟添夜話
殘燈無焰耿幽齋
憑君寫入瑤琴曲
並與秋風洛水排

夢焦蔗事坐在一官署論余除授於某官前

月十

十一
日夜

神交初不間幽明
夢裏相看儼若生
顧接宛同蘭省日
薦揚猶重故人情
楓林魂黯人何在
落月梁空思未平

枕上兩行知已淚覺來揮却又縱橫

送甯端甫宣慰東平

瀟洒風神見德隅走趨知不利長裾老諳所事無多味
却覺閒官是美除恩詔纔離溫室樹甘霖先沛泰山墟
憲陵山色溪堂月剩有詩來富尺書

送杜時舉歸平陽

四載河東頗閱人愛君能靜復能貧一朝夜雨韋郎話
滿眼睛雲玉壘春未分風塵淹駿足不妨麴蘖暫謀生

因君西邁添余興兩夜青山入夢頻

哭張總判行甫

并序

公諱縠北燕人姓張氏字行甫姿蘊藉好賓客官至
平陽府通判官詩所謂愷悌君子民之父母者也家
藏書數千卷後以累落職年五十有七終于家晚作
龍祠別墅溪風松月境趣瀟洒酒壚茶竈筆牀釣具
有幽居草堂之樂至元壬申余官冀府暇日與俱倘
徉其間者益三年於茲醉山頭之落日起舞鳴歌弄

茂陰之清泉沙鷗靜玩追思往事傷何如之爰作悲
歌以賡薤露其詞曰

酒病人看指日瘳扣牀辭別竟彌留歸軒東下纔幾月
哀訃聞來已兩秋石壁冷埋泉壤悶黃壚不隔暮山稠
分明昨夜龍祠夢醉卧藤陰唱石州

君善歌
石州慢

婆娑杖履桂叢幽常恐山中識故侯野約授書黃石在

菊香浮菴草堂秋

一作滿菴秋香陶令
酒一川風月武陵舟

宦情瀟洒陶彭

澤老境浮沉馬少游何日下車傾腹痛春風吹淚拜荒

丘

秋澗集卷十七